

Moder un Vader hebben ok wat Schuld. Heinke! So kann man en Kind doch nich nömen. Wichter heten Anna of Maike of Fenna un Jungse van Jan of Kai. Man Heinke?

„Ji glöven nich, well bi uns intreckt“, seggt Moder smörgens* bi 't Anbiet*. Vader smüüsterlacht*. Tomke leggt hör Stuuutje up d' Teller. Sachs* doch nich weer Tant Kea, denkt se. Dat leste Maal, as de Schandaal mit Unkel Geerd harr, is se wekenlang bi uns bleven un hett man blot blarrt.

„Well denn?“, fraggt Klaas un stengelt sük, ut sien Hoogstohl to klautern.

„En lüttje Minske. Wi kriegen 'n Puppke*. Un 'n Naam hebben Vader un ik ok al utköört: Heinke. Wat seggen ji nu?“

Tomke seggt eerstmaal nix. En lüttje Minske. Heinke. Noch 'n Bröör! Dat dürt doch woll nich wahr wesen! Hör is al disse fileinige Klaas to vööl. He knippt un bitt, un schüppen kann de Fent ok as mall. Alltied ritt he hör Boken to d' Schapp ut, un wenn de Dönner* sien Will nich kriggt, denn flegen de Legostenen dör dat heel Huus*. Un nu willen se hör noch een van de Soort uppuckeln! Moders Proot, wo mooi dat word

mit so 'n lüttjen Schieterke un dat se, Tomke, mit hör söven Jahr al groot is un düchtig helpen kann, höört se blot mit 'n halv Ohr.

„Moder, musst du dat Kind kriegen?“

„Tomke“! Vader kickt düll.

Moder ok. „Disse Fraag will ik nooit weer hören. Wi können blied un dankbaar wesen, dat uns wat Lüttjes schunken word.“

Blarren steiht Tomke vör d' Hals. Wo sall se blied un dankbaar över wat wesen, dat se nich hebben will?

Vader is na 't Krankenhuus fahren. De hele Weken*, as Moders Buuk allmanweg* dicker wurr, hett Tomke mit kien Woord van dat Kind uphaalt. Nu steiht se mit benaut* Gesicht tegen Opa un kickt to 't Fenster ut.

„Se komen!“, juchheit Klaas.

Oma löppt na d' Döör un ritt hum wied open. Moder is noch heel nich binnen, do hett Klaas hör al to faten. Se duutjet un drückt hum, man hör Ogen söken Tomke. Se schufft Klaas bisied un maakt de Arms wied open.

Tomke flüggt up hör daal un fangt up Stee an to raren.

„Mien Leevke, ik hebb so 'n Sücht na di hatt!“, seggt Moder liesaam*.

„Dat Kind sitt ja noch in 't Püütjepack*. Ik doch, ik kunn d'r al mit

spölen!", höört Tomke Klaas vernöchtert* böiken.

Se lett Moder löss un luurt na dat Bündsel up Vaders Arm. Groot Ogen kieken hör integen. Wo nümig dat Gesicht is! Tomke kann nich anners.

Se striekelt över dat Fuustje un mitmaal umslutt de Lüttje hör Finger heel fast. Tomkes Hart hüppket, so mooi is hör dat to.

„Un nu kummt de lüttje Grasmieger* eerst maal bi mi!", seggt Opa un knippoogt* vergnöögt.

„Grasmieger?", kummt Oma in Fahrt. „Vader, dat minnachtig Woord will ik nich hören. Wichter sünd nettso vööl weert as Jungse!"

Wichter? Tomke blifft in een Stück stahn. „Ik doch, Heinke weer 'n Jung", stött se d'r ut.

„De hele Tied hebb ik meent ..."

Se fangt al weer an to snückeren.

Vader tudel hör. „Meiti*, waar hest du dien Ogen un Ohren hatt? Rosa Strampelbüxen för en Jungske?"

„En Süster! Daar hebb ik ja al lang stievert*. Och Vader, un ik weer so lelke* tegen jo!" De Tranen lopen un lopen.

„Du kunnst uns de hele Tied so begroten*, Tomke. Man nu is 't all good", seggt Moder un drückt hör.

„Ziepeltrientje*", targt* Klaas. „Tomke is 'n Ziepeltrientje!"

Tomke kickt hum vergrellt an, man se seggt nix. De nare* Fent sall sük
man wahren! Nu sünd se twee tegen een!

Vokabels:

smörgens = morgens

Anbiet = Frühstück

smüüsterlacht v. smüüsterlachen = schmunzeln

sachs = hoffentlich

Puppke = Baby

Dönnner = Bengel

dör dat heel Huus = durch das ganze Haus

de hele Weken = die ganzen Wochen

allmanweg = steig

mit benaut Gesicht = mit bedrücktem Gesicht

liesaam = sanft

Püttjepack = Windel

vernöchtert v. vernöchtern = ernüchtern

Grasmieger = kleines Mädchen (Kosename)

knippoogt v. knippogen = zwinkern

Meiti = kleines Mädchen (Kosename)

stievert v. stievern = beharren, steif machen

lelk = gemein

begroten = bedauern

Ziepeltrientje = Heulsuse

targt v. targen = ärgern

nare v. naar = kleine

Zum Nachschlagen weiterer Vokabeln empfehlen wir das Plattdeutsch-Hochdeutsche Online-Wörterbuch der Ostfriesischen Landschaft:

www.platt-wb.de

